

文在十

民國新修合川縣志卷八十

邑人張森楷學

傳狀十

鄒立齋先生傳

崔 銑

君諱智字汝愚號立齋一號秋因子蜀合州人也幼有異質日誦萬言既長受書於舅氏馮進士衡居龍泉菴貧無繼晷之給乃集樹葉燃以讀書通宵不寐如是者三年成化丙午領四川鄉試第一名郡人聚觀於會江門外君馬上口占有天下許多難了事鄉人何用大相驚之句計偕上春官道出三原時大司馬王公恕致仕家居君往見之且曰治天下之道在進君子退小人而已方今小人在位羣邪肆毒智此行非但爲會試正欲上疏聖天子使進君子退小人則天下其庶幾乎王公笑而不答越半年丁未登進士第入翰林爲庶吉士宏治戊申有星變之異君上疏極論陰陽之理欲退萬安劉吉尹直而用王竑彭韶且言君子所以不進小人所以不退大抵宦官有以陰主之也疏入不報己酉言事者誣知州劉概御史湯鼎妄言朝政嫉君者因疏君名下

合川縣志卷八十

傳狀

一

錦衣獄君身親三木僅餘殘喘神色自若無所曲撓供詞略云智與湯鼎等來往相會或論經筵不宜以大寒大暑輟講或論午朝不宜以一事兩事塞責或論紀綱廢弛或論風俗浮沉或論生民憔悴無賑濟之策或論邊境空虛無儲蓄之具未審果係妄言與否時議者欲處以死刑部侍郎彭公韶辭疾不爲判案獲免乃左遷廣東石城吏目君毅然就道衣結履穿幾不能存親識餽送堅卻不受在官盡心政務廢墜畢舉而持己清白纖塵不染稍暇則從白沙陳獻章遊篤志聖賢之學所造益深矣辛亥十月卒於廣東壽竟二十有六卒之日囊無百緡左伯劉公大夏君同年進士順德令吳廷舉資之還其家君介直孝友取予惟義雅負奇氣與人寡合處事慷慨無阿比之習今上首登大寶明日常朝用御史二人侍班糾儀湯公鼎輪侍君造其私第曰祖宗盛時御史糾儀得面陳政務得失言下取旨近年遇事但惟退而具本此君臣情分所由間隔不通也公以言官奏對幸值大政維新之日請劾盛時故事此太平機會也及王公恕徵聘至京君曰三代而下人臣不復見君所以事多苟且老先生勿受官職先請見君時政之不便者歷歷陳

於上前庶其有濟若一受官職再無可見之時矣二公雖善其言而卒莫能用識者憾之其據經守義大率類此一時權豪貴戚聞其名爭請誨其子弟君拒而不納亦不妄登其門忠君愛民之心久而彌篤富貴利達視之漠如也詩文清勁平實不爲空言有立齋遺文若干卷行於世崔銑曰嗚呼古義不明古人不復世之素號爲士大夫通經術者立乎人之本朝則唯唯默默偷以全軀孰有如君之忠直乎於權貴貨利也見之則掉尾譚之則垂涎孰有如君之剛毅乎弱冠之年無導於前卓然自樹其孟子所稱豪傑之士乎假之以年所就殆未可量然執此以往則固青天白日斷斷乎不可磨沒是大有功於名教也故爲之立傳以詔天下後世云

公安伯李將軍傳

馮鎮巒

公諱如碧字翠白姓李氏系出咎繇隴西立郡源別於趙城唐以後隸籍中州相傳河南有火燒村半邊里者先世桑梓也有明時一派入南京一派入荆楚公於萬曆四十五年戊午十二月二十四日生湖廣荊州府江陵城外之筭箕垞族屬甚盛多有位於朝者父長春御史世父

合川縣志卷八十 傳狀

二

盛春保定巡撫兄如梅以平倭功由副將授安東將軍從兄弟寧夏總兵如松瀋陽總兵如柏平遼都督如楨工部主事如璨南京都司如璋錦衣衛指揮使如珪錦衣都指揮使如璉天啟時庶吉士若琳姪三韓督撫之藻南京指揮使之材極一時簪笏節鉞之盛故當時有李氏權重之讒載在明史可考也公生而隗異多勇略慷慨負大志崇禎己卯入弟子員領壬午鄉薦時年二十有四越二年甲申三月二十日逆闖陷京師莊烈帝殉社稷公聞變憤激呼天躑躅誓欲爲國除賊棄家遊江淮間結當時有才略奇士起義兵以削國恥乃所願不諧遂歸盡破家貲以助官軍時諸將多擁兵觀望號令不一公未邀一命無可藉手早知事之無成然旦夕北望未嘗不四顧流涕歔歔欲絕也洎我朝定鼎燕京志規進取大振六師陳兵於楚之老鵲灘荊州勢如危卵人心恇怯公不得已偕元配冉同日投荆水飄江上經七日不沒會大清兵前隊指揮使王某見而異之極力拯救公堅執自盡起而復溺者數四王某再三慰藉不獲已托王某麾下漸以功叨重用屢建殊勳順治十八年任滇南副將誥授前營驃騎將軍後復平定水西羅甸康熙三年

陞黔西鎮總兵晉秩太子少保提督貴州軍門居官二十有三年聖眷優隆嘉予備至康熙九年庚戌薨於大定府黔西鎮官署時年五十有三天子震悼贈公安伯蔭一子諭祭葬江陵縣筭箕垵祖塋公之入仕本朝也奮起戎行身經百戰歷十餘年聖祖知其能以爲滇雖重地僅寄一方黔西獨隸邊徼遠連廣粵近接楚蜀其間苗獠獯狃素稱桀驁難馴西南保障非公不可因重任之公甫建牙大定恩威並用洽暢人心梗化者討平之歸誠者撫綏之封疆謐寧兵民無不輯和故所在立生祠祀之至今不絕公雖武人而風趣不乏大定城外有地風景清幽因捐修東山寺延破山法嗣嵩目禪師主之暇日偕士大夫往遊千巖萬壑飛青擁秀春花秋月雅歌投壺極一時登覽燕會之盛其襟抱磊落不羣如此公平水西時有某王所贈寶劍良馬劍能於水中截髮馬鼻中出雙鬚長尺許及進征苗獠督騎兵往勦入深箐數十里諸苗以木石斷後反兵攻擊公策所賜馬突圍直登木柵騰蹕如飛諸苗惟連贊好馬好馬亦無如公何後旋振旅討平之是役也若無此馬幾殆而公之神勇亦略可想見云

楊縣令傳

楊卿雲陝西朝邑舉人性廉悍有膽略乾隆五十八年由銓部揀發令清溪甫下車卽爲文告於城隍曰維清邑地當孔道站遠差繁又值大軍之後民困財絀而公家程期分難推卸知縣臨蒞茲土憫念哀鴻雖有寬恤之心而無息肩之術惟有潔己秉公自支應差務而外苟絲毫侵削窮黎自奉自肥明神鑒察誅殛無辭蓋公發軔之初克己自勵其風骨已如此維時廓爾喀不靖西藏用兵戰士雲集隨營軍器火藥糧餉等項動運數十百萬有奇羽檄飛書馳騁於道邑地當叩嶮飛越之間危岩絕棧車馬夫役酒食供頓日夜應接不暇而臺使者方且出面具以嚇人索犖求齧動輒鞭打門丁斥叱官長前署令史欽義值鄂蘊山制軍督師進藏時一日來四觀察五總兵軍仗器械填塞街衢史公窘急自刎幸不殊當日聞令茲地者無不色動神驚歎無可如何也公至與士民相見集紳耆告之曰夫馬應役國有令甲制府夫若干名馬幾匹大將軍夫若干名馬幾匹其餘援例支付勿得過有挾勢陵索縣令當之時大帥坐藜廳公廨公立堂階前親持券票一一酌給後一武

弁因索馬爭鬪公謂汝殊不稱也卽面啟大將軍曰馬盡矣惜少障泥知縣尙堪作駕駘驅策乎大將軍聞言氣奪卽日拔營去先是諸大吏所至州縣每供公膳味備山海猶苦無下箸處公進常品並及瓜蔬親送至公廨門曰荒落山縣遠賈不至爨爨薄味略等獻芹大人無嫌也闔者怒麾之去公卽攜歸據案大嚼腹爲一飽聞公平日每朝市肉一斤幕客及半夫人公子不得食也越數日某郡守至示微疾需索逗留公趨行館促之曰憲臺奉檄從軍連日不發恐瘠剝小邑有簡從者幸勿留時役徒已具輿夫強索加班逼一人墜巖死守疾馳至縣三十里地名富庄公遣役追及繫輿夫四人置之獄通稟大憲大憲急撤公還省去履任初方二十九日耳邑民父老子弟無不歎息走送六十里至黃泥浦灑淚而別外史氏曰世稱強項令今乃見之蓋公本秦人賦性剛勁具易于之心兼秀實之氣可謂仁而且勇矣或謂獲上治民居官不宜有此夫士人一行作吏苟祿位念重則慈惠念輕都茲窮黎忍而爲之何所不至一經威攝顧後瞻前奄奄如就木人耳如公之念切斯民一往不顧可不謂賢歟雖古循吏何以加茲誰能絕人命以作時世賢君子所爲讀道州春陵篇而浩然三歎也

陳楊氏事略

蔣璧芳

楊氏山西人其父官四川知縣候補省垣因以適溫江縣學生陳日新陳方縣試冠其曹縣令李公名進士號知人決其文必發因爲執斧柯贅於楊氏有容色父母鍾愛之衣文繡役婢媪四人將彌月生色若甚戚氏問之曰吾家貧父貨紙爲生母自汲自爨卿今美衣食服役多人至吾家何以安氏曰是何難卽遣婢媪去衣布衣裙偕生歸拜翁姑畢共母操作陳生居湫隘父母共案食生與父母匙箸皆氏親進之飯皆氏走盛之以爲常惟勸生發憤顯揚慰親心生讀於外不常歸歸則氏不喜恐其廢學也秋闈再報罷家益窘陳生館他縣恆經歲不歸無何而氏竟死矣歸陳生七年生一女殤咸豐七八年在錦江書院與陳比舍居朝夕得縱談陳號敬夫每道之淚涔涔不自禁聞者亦心動遂識之贊曰幾於桓少君之餘風矣惜陳以諸生終不克樹立如鮑宣氏亦滅沒無聞焉顧吾見女遠不若壻家者或以交謫聞有稍過於壻家者則遂不禮於舅姑自世風日下而陰教之不理也皆帖然安之不復以

爲怪如氏柔順知大義如古列女傳中人可多得哉氏有姊適雙流陳氏妹適彭山郭氏皆諸生月課時吾及見之其碌碌亦相等云

銅梁宋烈婦傳

宋烈婦湯氏銅梁縣之農家婦也早寡無翁姑弟兄一子幼婦持家有能名里有徐某富而狡婦故無產業僦耕徐田徐陰欲得之計誘之婦不從則揚言誣毀之且將強娶之氏不勝忿鳴於官官紈袴且貪污受徐賄轉爲媒合氏父湯貧無行徐賄錢百千湯叟實僅得錢二十千反爲徐徐堂供前許納婦爲妾後不肯婦忿之而始控之眾證執一辭且引婦父湯爲據官亦擲掄之不從且將加刑責婦供置不問差幹役押婦於店案證與其父湯叟皆慙使歸徐又借官勢多方恐駭之婦奇寃自念非一死無以自明幼子甫十齡知其意依依守之不肯去一日婦呼渴命子取茶飲子猶不行婦怒呵之子不得已去而婦竟自刎死矣婦受誣枉死無人爲申理公論則大譁是年鄉舉邑之人士公具呈於當路廉得實令題參徐抵罪而婦寃始得雪適同年友陳君世五董修縣志有求余屬其直筆者因得聞其詳論曰州縣親民之官也其稱曰父母自州縣以貨得而貪污吏子弟眷屬復爲州縣其中始無所不有爲上臺者又受其節壽之餽遺而庇護之則其悍然不顧之態豈復可以人理繩之哉如銅梁令者亦足以見一斑也丙子入都與吾蜀居言路者言之銅梁吳侍御將具疏而川督題參之旨下蜀人爲之一快云

黎節婦事略

陳澤民

光緒二十年太后六旬萬壽天子詔禮部飭各行省題旌婦女定遠訓導郝公鄉以黎節婦申請蒙旌其族人黎申唐數爲澤民誦述事狀以其行之美而身微賤獨其宗親鄰里知之於是思以廣其傳焉節婦姓周氏定遠縣人十七歸黎光廷家微也周縮食緝匱相夫以敬無怨言歸十載而光廷死周悲哀欲自經或曉之曰汝祖舅祖姑眊矣汝姑青年喪夫亦如汝今又喪子且老矣勿爾重傷姑心周俛默久之乃椎胸茹痛而外節哀以慟姑焉同治二年祖姑向病痿痺動止不良有所需以頤指以目求有苦蹙顰而已周與其姑蔣聽視無形常先意而得之夜侍寢處前後浚溢率一夕六七起周時其將起而承厠踰於榻側蔣

扶左周則扶右屢起以爲常嚴寒大浚則周啟移手足而蔣身翼護之或微霑污易中裙拂動甚微蔣留側周卽取澣滌不覺其穢黎明向欲起蔣貼身而坐之於床周進衣繫紵進履足纏帶乃相輔而昇於椅蔣執笄櫛髮周約之及沐饋蔣奉槃周用巾及食周具饌蔣侑之晝日更番遞侍姑出則婦入婦出則姑入有呼則唯命或姑病周一身旣顧事姑藥餌寢食又兼代姑以事祖姑彌謹彌敕如是者五年而向死矣繼祖姑劉性嚴厲蔣周旋其間委曲如志舉家事精粗劇易一責諸周周先雞鳴而作後斗轉而息終日皇皇箕拘無塵井汲無濡半米寸薪必珍必戒膝下女子子與子婦各有課課畢而紡績而經營錢布入飢豬雞出種蔬果晨而耘夕而糞力親諸纖瓌無晷暇繇是戚族僞所見賢母無如周勤者遭罹屯蹇比六年中祖舅歿越二年繼祖姑歿而黎氏家貧如洗矣幸蔣老不衰強飯健步周得雇鍼黹緝纊澣衣於外以求直二子作藥肆傭子婦亦如姑傭賃自給天其或者將興黎氏乎周今年五十四蔣今年七十三先是同治庚午已旌節孝如例後有大人先生仿後漢書列女傳合姑婦而類編之則其事實具茲希有取焉

附 譙育堂先生傳

胡作荃

譙先生字育堂諱開英合川篤行君子也前清光緒己卯恩貢生候選州判以母老故未出仕其先世本楚人自長年公入蜀明季避難黔省賊平歸蜀插業合川縣南永里石華山遂家焉世以耕讀爲業傳七代至翼如公翼如生丈夫子五先生居長幼而醇謹不苟言笑授以詩書穎悟異常及長與人交未嘗忤辭色人恆敬之從遊同里名孝廉周作孚門最久試卽前列作孚期以大器常謂人曰譙生勵學敦品迥越尋常人益敬重因家道窘及冠廢讀設帳然課徒暇餘好學不倦媿於文子生平尤篤倫理卽以修貲所得侍奉甘旨有韓伯瑜蔡中郎桑虞王裒諸賢遺風家族效之里黨師之而尤印入荃之心目中者荃侍公雖晚以姻誼故齟年從遊其門一日命同行偶失序責之曰童子當隅坐隨行教以禮法如此至今猶兢兢於懷不敢稍越荃之遊於通都大邑及厠身議席略有建白不爲端人正士所棄者皆先生之教也其他門人掇科名者甚多卽終身布衣者亦不失爲一鄉之善士使先生早歲得志本其道以大用可以匡君可

以鋤奸可以化民而天下未有不治乃夫之厄善人甚於厄才人厄才人猶可厄善人則正氣不伸大道不立此世風所以愈趨愈下終難挽救也先生久困童試壯始遊庠食飭復躋秋闈屢薦不售迄光緒己卯科試乃以恩貢就職州判然先生已逾艾年翼如公雖壽終而太安人八旬在堂縱奉親捧檄而仕亦孝子所樂爲而先生昔年攻苦長此抱病光緒壬午三月下旬頓歸道山噫嘻天之厄善人何其甚耶先生之志雖未遂先生之道猶可傳先生素以孝友爲立身根本少就傅出入必告面天性使然也因翼如公積學未售壹意詩書以承父志及遊庠食飭不干公事不履公門兢兢焉氣節自勵不與世之干謁者伍卽課徒必就宅近館以便定省課餘問視日日無間且能先承親意曲順親心使無一息一毫之不安翼如公有疾日侍湯藥弗懈及歿三年不茹葷不飲酒雖抱病不改其常太安人年七十兩次染重疾醫無策先生爲母乞壽疾竟愈及後館地稍遠作書問安時以親爲心孟謂大舜五十而慕先生其庶幾乎因而以孝親之心及於兄弟其教諸弟也出於愛其待諸弟本於誠故教讀數十年無私積悉公用卽析爨後諸弟有不濟者尙分貲補助謂非此傷手足卽傷親心也先生配程安人亦能和睦一家得賢名而享上壽當先生歿時太安人泣曰吾家孝子也鄉人聞之亦悼歎弗置至其樂善好義里中感之寒峻霑之猶其餘事先生有子三次不祿而長君誠齋少君竹軒皆循循然恪守家風爲一鄉端人五弟松亭先生附生松亭子杰歲貢生銓選儒學訓導堂姪輝張增廣生鴻淵廩膳生文名噪於一邑正聲播於鄉里皆受先生之教感先生之德以垂矜式於後人者也故縣人稱永里譙氏必首育堂先生云

老良傳

李昌運

戊午春昌運館曾君遂良家有老人夜至共晚食年七十八耳聰目明言辭爽朗曾君曰是雄於貲者手積三十萬錢不置產業而耕人田今尙爲吾佃戶也予視其人若不親耒耜然食頃予督課去聞高談有聲多勸人語天遲明起振衣不倩人扶持歸家殆四十里云予疑之暇與曾君談及此曾君目坐客熊曰子與老良習處當詳其家世請爲先生言之坐客年亦老曰老人陳其姓忠良其名人習呼爲

老良縣興仁里大土保人也父某爲豬販困於酒生平積錢四十千佃來里高歇坪山土忠良性至孝童時父爲納任氏女作養婦成配後男耕婦紡各正內外有弟晚出母老乏乳任爲乳之弟依任如母見者不知其爲嫂也極誠樸人恆給之歲有餘積使囤穀同治甲子石穀銀十兩得數百金自此家漸裕鄉里率向借貸無不允借後償以低貨如梁麥油餅等類輒昂貴亦不知其所以然庚午辛未河伯災爲從古僅見有種大成會河土借貸忠良作佃資者屢歲無收穫主客相怨以累忠良否則舊債悉化烏有忠良無奈移家去歲則大熟累歲之歉報以一歲之豐也是歲餘千貫今猶耕是業生子七每婚配輒佃田使耕期勿忘農業弟有二子亦與諸子同分每人派錢五百貫不稍異環室而居里許數里可通呼吸其尊人患痺症數年食息起居事事躬親衣袴穢褻持向河干洗滌不委妻不委兒孫婦尊人年七十八母少二歲同月卒喪葬如禮馬鬣三尺鄉人稱焉老良尤善談陰隲不絕口鄉里口角集兩造於臨街宅一言立解塾數金數十金數百金常不計期事寢而已子弟使稍讀知禮義然重在耕次子癖於嗜好屢戒不悛逐出仍恤其子使耕嘗曰汝其蓋乃父愆配任慈惠勤儉紡棉爲樂三日紡紗一觔親爲絡繹臨場親爲左對數十年如一日也每場易棉後兼爲鄉人了不了事事已爲兒輩買食物歸使瓜分有差諸兒曹孫曹及婦孫婦亦輪日來視夫婦奉物爲夫婦壽夫婦視如客幾不知老之將至子惟次子婦早喪餘俱存男女計十三人男女孫曹五十七人男女曾孫曹七人昇平人瑞此爲近之曾君亦謹其言信而有徵予謂匹夫能享千金才智亦必過人然無不從根本上懋厥修爲也獨怪辛壬變故古今一大變局富貴之族不安於室亂世多財非福信矣哉若人父子兄弟比屋而居他人所見爲荆棘者已若不知人世有攀蘿捫藤之苦殆桃花源裏人家也予用輯熊君之言作老良傳